

## Eingangslied: EG 447,1-5



P1. Sing mer e Lob - lied, prei - sen un - sern  
Herr - Gott. All, die ihn ehr - en, sa - gen heit mol  
Dank - schä, kum - men zu dir un ken - ner will schon  
häm - geh. Gott woll'n mer lo - we.

P2. Dass er die ganz Nacht iwwer uns gewacht hot, halt ach e Aag druff,  
dass de Dag gut rum geht, un steh uns bei wann als en scharfe Wind weht.  
Gott woll'n mer lowe.

P3. Dass mer noch klor sinn un ach unne dicht sinn, des is en Sege. D' Lippe  
kanschdt bewege, Kopp un die Händ sinn gsund, dezu noch rege. Gott woll'n  
mer lowe.

P4. Uns muscht a helfe Regle zu befolge, dursch unser Fehler niemand  
kummt zu schade, krigg mer des hie, dann geht a kenner bade. Gott woll'n  
mer lowe.

P5. Ach, treuer Vater ohne wenn un aber, des tät viel nütze, wann du uns  
kenschdt b'schütze un uns begleitschd; bischt immer unser Stütze. Gott  
woll'n mer lowe.

**Votum:** Dann wolle mer jetzt mitenant aafange im Name vun  
uns'rem Herrgott, an den mer alle glawen un uff den mer all uns're  
Hoffnunge setzen. Denn er ist jetzt in uns're Mitt: De Vadder, de  
Sohn un de Heilische Geischd. Amen.

**Psalm:** EG 730 / Psalm 47

Klatsch'n froh in die Händ, all ihr Lait,  
un tun mit Fräd laut Juble fer unsern Gott!  
Gott fahrt enuf mit fröhlichem Lache,

unser Herrgott mit Klang vun Posaune.  
Tun Loblieder singe fer unsern Gott immer un immer widder,  
tun Loblieder singe fer unsern König!  
Denn Gott is König über die ganz Erd;  
Tun ihn lowe mit Psalmen!  
Gott ist König üwer alle Völker,  
Gott hockt uff soim heilige Thron.  
Die Chefs vun alle Völker hän sich versammelt  
als Volk des Gottes Abrahams;  
denn Gott g'hären die Starke uff dere Erd;  
er is än Hochkaräter.

**Gloria Patri:** EG 177.2



**Pf.:** Ehr g'härt em Vat-ter un em Sohn un em hei - li - sche



Geist, wie 's war am O - fang, jetzt und im - mer schun und



vun E - wig - keit zu E - wig - keit. So g'härts!

**Eingangsgebet:** Guter Gott, mer möchten uns zum Himmel strecke, wär'n gern frei vun allem, was uns ze schaffe macht un die Luft abschniert. Demdewege gucke mer enuf zum Himmel. Ja, `s liebscht wärs uns, wann uns Flügel wachse däten un mer schwerelos zu dir kumme kännten, ohne all die Laschte, die uns do hunne an die Bää gebunne sin. Geb du uns die Kraft, dass mer in de Himmel fliege können grad so wie junge Adler des tun. Befrei uns vun denne Laschte, die uns net vorwärts kumme lossen. Ja, lass uns wider uffrecht gehe, damit mer dich lowe kinn` mit unserem ganze Lewe. Amen.

**Altarvers: EG 618,1-3**



P1. Ver - gess net zu dan - ke dein Schöp - fer und Gott, er  
Un - denk dra, was er dir als dursch - ge - he losst, er



hott dir viel Gu - des ge - da. Barm -  
nimmt disch, grad so wie'd bischt a.



her - zisch, ge - dul - disch un gnä - disch is er, viel



m#h wie en Vad - der kennt soi. Er schmeißt un - ser Sün - de ins



of - fe - ne Meer. Kumm, sctimm in des Lob - lied mit oi!

P2. Du kannscht ihm vertraue, findscht immer sein Troscht, wann'd glaabscht, dass jetzt gar nix mäh geht. Er hilft dir, ach wann'd mol en Bock g'schosse hoscht, is der, der dann klar zu dir schteht. Barmherzisch, geduldich un gnädich is er, viel m#h wie en Vadder kennt soi. Er schmeißt unser Sünde ins offene Meer. Kumm, sctimm in des Loblied mit oi!

P3. Bei so viel Verständnis bleibt uns bloos noch Dank. Gott hott uns fer sisch auserwählt. S'kann jeder debei soi, Queerbeet dorsch die Bank. Soi Zusage is s'änzigscht, was zählt. Barmherzisch, geduldich un gnädich is er, viel m#h wie en Vadder kennt soi. Er schmeißt unser Sünde ins offene Meer. Kumm, sctimm in des Loblied mit oi!

**Schriftlesung: Lk. 24,44-53**

Do hot de Herr – also de Jesu – zu soine Jünger g'saat: »Als ich noch bei euch g'west bin, do hab ich aich g'saat: Es muss alles so passiere, was über mich schun vor Johre uffg'schrib worre is – im Gesetz vum Mose, bei de Prophete un in de Psalme.« Dann hot er ne g'holfe, die Heilige Schrift richtig zu kapiere. Do hot er g'saat: »In de Heilige Schrift, do hääst's: De Christus muss leide un am dritte Tag vun de Tote uffstehe. Un alle Völkern müssen's um soine Name wille häre:

>Ännern aier Lewe! Gott will aich aire Dummahaite vergewe.< Fangen doedemit in Jerusalem an! Ihr sell'n g'rad stehe fer alles, was passiert is. Ich werd' den Geist zu aich schicke, den wu moin Vater versproche g'hatte hot. Bleiwen do in de Stadt, bis `ner die Kraft vun owwe kriiet hän.«

Dodenoch hot de Jesus se aus der Stadt hinausg'brocht bis nach Betanie. Dann hot er die Händ hochg'howe un se gesegnet. Un g'rad dodebei is de Jesus in de Himmel nuff g'fahre. Do sin die Jünger uff de Bodem g'falle un hän zu'em gebet'. Dodenoch sin se glicklich widder noch Jerusalem z'rück g'schlappt, waren die ganz Zeit im Tempel un unserm Herrgott schöne Lieder g'sung un em Dankschä g'saat.

**Lied vor der Predigt: EG 265,1-5**



P1. Mer Chrisch-de sin - gen jetzt e Lob, em Herr-  
Gott, Sohn un Geischt, der iw - wer - all un je - der-  
zeit uns all sisch gü - tisch zeigt.

**P2. Er gibt uns Friede un gibt Frääd, soi ganzi Heilischkeit. Er hot uns wie soi Kinner lieb un gibt ihr Einischkeit.**

**P3. Mach, dass mer alle Gschwider werr'n, uns un Minanner frähn, wie's unser HerrGott so gern sieht noch soinem Vorbild lew'n.**

**P4. Ach, guter Gott un unser Herr, helf als e bissel mit, dass alles, was bei uns so laaft, in deinem Sinne g'schieht.**

**P5. Jetzt hätten mer a noch die Bitt: Loss uns als ehrlich soi. Geb uns dein Sege immer mit. So kânt's net schänner soi.**

**Predigttext:** Apg. 1,3-11

Als de Jesus des mit'm Kraiz un `nem Grab hinner sich g'habt hot, do hot er geguckt, dass ihn soi Lait a immer wieder sehe kinn, damit se kapieren: Der lebt jo tatsächlich noch! Un des 40 Tag lang. Un in dere ganze Zeit hot er ihne verzählt, wie's in Gottes Reich zugehe dut.

Emol hot er widder mit soine Jünger z'amme g'hockt un gesse. Do hot er zu `ne g'saat: „Schreiwen's aich norre gut hinner die Ohre.

Bleiw in Jerusalem und waarten uff des, was aich unser Vatter im Himmel versproche hot. Ich hab's aich jo ach schun verzählt: De Johannes, der hot die Lait mit Wasser gedaaft. Awwer in e paar Taag do wär'n ihr mit'm Heilige Geist gedaaft wärre.

Do sin die Jünger ganz uruhig worre und wollten vun'em wisse: Un dann, Jesus, machscht du dann, dass de Herrgott widder `s Saache hot in Israel? `S wär endlich an de Zeit!“ Do hot de Jesus ihne bloß Retour geb: „Ihr missen net wisse, wann's soweit is. Des is allä unserm Vatter im Himmel soi Sach. Awwer wann de Heilige Geist bei aich oischlacht, dann werrn ehr stark werre. Dann hän ehr kää Angst mäh alle Lait vun mer zu verzähle. Net nur in Jerusalem, in Judäa oder in Samaria, nä ach uff de ganze Welt.“

Als de Jesus alles g'saat g'hatte hot, was zu sache war, do hän sich die Jünger uff emol die Aage reiwe müsse, weil se net glaawe konnten, was jetzt bassiert: Uff emol hoggt de Jesus nämlich uff änere Wolk un fliegt express ennuf in de Himmel. Un fort war er, so schnell hän se net gucke kenne.

Un wie se sich gegeschtig so a'glotzen, seh'n se zwä Kerl do stehe in weiße Kutte. Die war'n ewe noch net do gewest. Un die saachen zu'ne: Was gugge nern dann als noch in de Himmel nuff, ehr Kerl? Ja, de Jesus, der hoggt jetzt im Himmel drowwe. Awwer er kummt ach widder z'rick, g'rad so wie er in de Himmel g'fahre ist: Uff em Wolke-Express.“

**Predigt:**

Ich wäb jo net, wie's aich als geht, ehr liewe Lait, wann er B'such g'hatte hän: Ewe hoggt mer noch schä z'amme. Un schwupp die wupp, uff emol sin die Gäscht fort; hämgange.

Dass des mit'm Abschied awwer ach immer so schnell gehe muss! Dabei war's doch so schää. Mir hän verzählt un gelacht, disputiert und Uuz gemacht. Un `s hät grad so weiter gehe kenne. Awwer jetzert – vun jetzt uff glei sin se fort, die Gäscht.

Un was kummt jetzt? Gucke mer als noch hinnerher, obwohl se schun längscht um die Eck geboge sin und mer se schun lang nimmie sehne kinn? Un warum? Weil mer eigentlich noch gar net fertig waren? `S noch so viel zu verzähle gebt?

Awwer nix mäh! Was jetzt kummt, des is umdreh`, noigeh un uffraame: die leere Flasche fort, des dreckische G'schärr in die Spülmaschin un de Müll in de Dreckkäamer naus. Un dann is Feierowend.

Ug'fähr so, ehr liewe Lait, ug'fähr so isses de Jünger wohl ach gange vor 2000 Jahr, als se mit'm Jesus z'amme g'hockt hän un uff ämol, schwupp die wupp, isser mit'm Wolke-Express abgedüst. Sie hän'em g'rad noch so hinnerher gucke kinne.

Awwer so richtig fertig waren se net mit'm. So viel hätt'n se gern noch mit'm verzählt; hätt'n se g'härt, was er noch zu sache hot; hätt'n se g'sehe, was er noch alles macht; wie er die Welt noch weiter uff de Kopp stellt; wie er bei denne Mächtige in dere Welt uff de Puzz haut un se endlich kappieren: Net ihr seid die ‚Big Boss‘ in dere Welt, sondern de Herrgott is de ‚Big Boss‘. Was er saacht, is richtig und passiert.

Doch ebbes is dann doch annerscht g'loff: Wie se sich so umdreh'n un wie'se noigeh wolln, do steh'n do uff ämol zwä Frem'e mit weiße Kittel. Awwer des sin kä Dokters un ach kä Pfleger vun de Landeck, die wu die Jünger vum Jesus abhole woll'n, weil se vielleicht Geischer g'sehe hän. Nä. Die zwä Frem'e steh'n äfach do wie b'stellt un net abg'holt. Doch dann saachen se was zu de Jünger: „Was glotzen ehr dann so dem Wolke-Express hinnerher? Ehr missen aich kenn Kopp mache. De Jesus, der werd grad so widder zu aich z'rickkumme wie er g'rad ewe fort is; widder mit'm Wolke-Express.“

Die Jünger hän do druff erscht emol nix g'saat. Mer kinnt mäne, die hän sich gedenkt: „Jo, dann is des halt so. Dann kummt er irgendwann widder z'rick mit'm Wolke-Express.“ Die hän noch net emol mit de Wimper gezuckt und g'froot: „Un wann is des? Wann kummt er widder z'rick?“ `S hätt jo kinne soi, dass die zwä Weißkittel mäh wissen un `sne saachen. Weil de Jesus hot ihne jo nix verrote. Awwer noch ebbes is annerscht: Die Jünger sin jetzt net äfach widder noigange un hän uffgeraamt un sauwer gemacht; die sin net äfach widder häm gange zu ihre Lait un hän mit denne verzählt: „Wäscht noch, wie mer mit'm Jesus z'amme g'hockt un verzählt un gesse un

getrunke hän?“ Die hän jetzt net äfach z’rickgschaut un sin in ihre Erinnerungge hänke gebliwwe un hän Trübsal geblose.

Nä, die sin widder nach Jerusalem un hän dort g`waat. G`waat, dass des passiert, was de Jesus ihne versproch g`hatte hot: dass de Heilische Geist se packe tut; un dass de Jesus z’rick kumme dut widder mit’m Wolke-Express.

Sie hän also net äfach norre z’rick g’schaut, ihre Erinnerungge an de Jesus immer widder uffg`wärmt. Nä, sie hän schun weiter geguckt; waren g’spannt, was als Nächstes kummt; wie die Sach mit’m Jesus weitergehe dut. G’rad ach, weil er jertzert jo fort war – mit’m Wolke-Express.

Irchendwie hän se g’spiert: Jertzert isses nimmi Jerusalem, nimmi Zion, wu wichtig is um Kontakt zu halte zum ‚Große Boss‘. Mer muss nimmi in de Tempel renne un Tiere uff’m Altar verbrenne.

Jertzert wird sich alles um de Jesus drehe: dass er g’storwe war, awwer ach widder rauskumme is aus’m Grab. Des war em ‚Große Boss‘ soim Wink mit’m Zaunpfahl fer uns Mensche. Dodemit hot er uns gezeichnet, wu de Haas lang laaft. Mer missen so lewe, wie’s de Jesus uns gezeichnet hot. Uff ihn misse mer alles setze, was mer hen. Dann klappt’s ach mit’m Gott soim Reich uff dere Erd - irgendwann. Wann genau, des wisse mer awwer net. Des hot er uns net verrote. Ja, dodruff waarte mer jertzert schun 2000 Jahr. Doch was sin 2000 Jahr fer unsern ‚Große Boss‘ wann die Welt, die wu’rer g’schaffe hot, schun e paar Millione Jahr uff’m Buckel hot?

Also ich denk als: Des hot noch e bissl Zeit. Do kenn’n mer noch e paar Schoppe petze und z’amme hocke mit selle Lait, mit dene mer grien sin. Un do kenn’n mer ach noch e paar mol ‚Tschüss‘ saache. Awwer mer wissen halt ach: ´S is noch net Schluss. Noch lang net. Erst wann mer de Wolke-Express sehen mit’m Jesus druff. Dann isses so weit.

Amen.

## Lied nach der Predigt: EG 425,1-3



P1. Vun doim Frie-de hätt mer gern, un dass bei uns



bleibsch. Doi Ver-spre-che hoscht uns gew-we,



un-ser Angscht ver-treibsch. du al-lä, gu-ter



Gott, du al-lä, gu-ter Gott, hallscht die Fä-de



in de Hand, bischt do un verz-zeihsch.

P2. Loss uns frei soi jeden Dag, mach die Wege weit, dass mer immer wach soi kennen, stets mit Mut bereit. Denn durch dich, guter Gott, ja durch dich, liewer Gott simmer frei in jedem Land, Einigkeit gedeiht.

P3. Schenk uns Fräd so oft wie's geht, ach, des wär doch schä. Dankbar wär'n mer, des derfscht glawe, Missmut dät vergeh. du allä, guter Gott, du allä, guter Gott, hallscht die Fäde in de Hand, bischt do un verzeihsch.

**Fürbittengebet:** Guter Gott, du machst de Himmel uff fer alle Lait. Kens is do zu klä oder zu groß um bei dir zu soi. Un mer frän uns üwwer alle Lait, wo uns spüre lossen, wie arich du uns liewe tuscht. Du machst de Himmel uff fer alle Lait, Gott. Deshalb woll'n mer dich bitte fer alle Lait, die dodefufu nix spüre känn: fer alte Lait, wu allä sin; fer kranke Lait, wu kängs noch guckt. Hilf, dass sie ach e bissl was vun doim Himmel spüre könn; dass es ihne ebbes leichter werd un sie ach Fräd hen im Lewe.

Du machst de Himmel uff fer alle Lait, Gott. Deshalb woll'n mer dich bitte fer alle Lait, wu arm dra` sin un nix zu beiße hän; fer die, wu dehäm Krieg hän un alles abkrie`hn, obwohl se doch gar nix defer

känner; fer die s'Lewe die reinscht Höll is. Sei fer se do un loss doin Friede un doi Gerechtigkät vum Himmel üwwer ihr Heimat fließe.

Du machst de Himmel uff fer alle Lait, Gott. Awwer die Erd is ach doi Schöpfung, die wu mer Mensche immer noch weiter kaputt machen, so dass bald kä Menscheseel mehr do g'scheit lewe kann. Soi ach fer doi Erd do. Und schmeiß Hirn vum Himmel, damit mer Mensche ach was dodebei helfe kinn, dass die Erd en schöne Fleck bleiwe dut.

Amen

**Vater unser:**

Unser Herrgott im Himmel, doin Name soll heilich werre, doi Reich soll kumme. So wie du's willscht, so soll alles bassiere bei dir do drowwe im Himmel un bei uns do hunne grad so. Geb uns jeden Dag se esse. Un vergeb uns, wann mer was verkehrt gemacht henn, mer verzeihens de Annere jo ach. Loss mich standhaft bleiwe un halt mer de Deiwel vum Leib. Dir g'heert doch die Schöpfung, du hoscht die Kraft un alles Herrliche in Ewigkeit. Amen.

**Segen:** Gott macht uns de Himmel uff un schenkt uns Lewe. Jesus zeicht uns de Weg in den Himmel nuff. Un Gottes Geist – er halt die Verbindung zwische Himmel und Erd fer uns uffrecht. Amen.

**Lied:** EG 610,1-3



P1. Herr, mer bit-ten: Kumm un se - gen uns.



Frie - de schenk uns all - mi - nan - ner.



In doi Händ noi do be - geb' mer uns.



Helf uns aus mi dei - ner Kraft.



Wann de Mut uns fehlt, uns en Kum-mer quält,



loss uns trotz - dem fräh - lisch blei - we.



Frogscht disch noch em Sinn? Al - les halb so schlimm!



So, wie's kummt, so is schun recht.

Kehrvers

P2. Wann mol Zores is, Ausgang u'gewiss, helf, dass mer uns ball vertragen.  
Ruh un Friede bleibt, treib mers net zu weit, ja, dodruff vertrauen mer.

Kehrvers

P3. Wann die Not is groß, mer verzweifeln bloß, dät mer gern doin Troscht  
verschbiere. Gucken net zurück, suchen unser Glück bis mer's g'funne hänn bei  
dir.

Kehrvers